

Entrevista exclusivo...

DEN AMBIENTE

PATRICIO WINTERDAL MUSICO GRADUA NA CONSERVATORIUM...

“MUSICONAN GRADUA MESTER CONTRIBUI PA ENGRANDESE NOS MUSICA EN GENERAL”...

** Siman pasa diadomingo a bolbe Aruba despues di 19 aña residencia na Hulanda, e musico profesional Patricio Winterdal, kende aña pasa a gradua na Utrechtse Conservatorium como maestro di bajo.

E studio aki a tuma Patricio Winterdal cinco aña. Durante su estudio el a forma parti cu varios popular bandanan musical, manera e.o. Saljuco di Edsel Julliet, Orquesta Salsa Amsterdam, Tropical Extasy, Contesta di Elvio Pietersz y hopi mas.

Artistanan y bandanan musical cu el a yega di acompaña como freelance tabata e.o. Unisono, Rumbata, Banda 110 di Carlos Rosa, Macario Prudencia, Juni Julliet, Freddie Gumbs y tambe cu e famoso Candy Dulfer.

E ta sumamente contento di por a bolbe Aruba como mae-

stro di musica. E studio na Utrechtse Conservatorium no tabata uno facil. Tabata cinco aña di puro lucha, den cual e mester a hasi sacrificio di traha anochi como musico, pa asina e por a cumpli di paga su estudio.

Esaki tabata duro, ya cu e mester a studia seis ora pa dia na Conservatorium y alaves cinco ora di practica na cas. Pero cu su perseverancia y cu su meta firme su dilanti, el a sa di logra gradua como maestro di bajo.

Apesar di tur su bon contactonan na Hulanda, na unda el a haya varios ofertanan atractivo, toch el a tuma su decision pa bin establece su mes na Aruba.

Ofertanan cu Patricio Winterdal a haya na Hulanda, tabata e.o. for di Saskia Laroo, kende ta un artista hopi conoci na Europa. Ultimo tempo



Patricio a realiza varios gira

cu e banda di Saskia den paisnan grandi manera Helsinki, Alemania, Malta,

Italia, Yugoslavia y Paris.

E motibo cu el a dicidi di bolbe su isla natal, ta pa e hecho cu e oportunidadnan cu

e no a ricibi durante su temporada juvenil aki na Aruba, e ta sinti cu e juventud na Aruba mester di maestronan pa estimula nan.

Segun Patricio cu na Aruba tin hopi talento joven, pero ta e guia nesecario nan mester di dje na tempo. E ta kere cu tur e musiconan di Aruba gradua sea na Berklee College of Music y na Conservatorium na Hulanda, mester contribui cu nan experencianan pa engrandecese nos musica en general. Y esaki mester cuminza cu nos futuro jovennan kendenan mayan ta nos futuro artistanan.

Por a compronde for di Patricio Winterdal cu e tin deseo pa traha na Arubaanse Muziek School. Tambe e ta semper dispuesto pa esnan cu ta interesa pa tuma lesnan di bajo, por tuma contacto cu su persona na tel: 36799....

MARQUA TA MANDA SU DOS SOLDATNAN DI MAYOR RANGO PA CONQUISTA E TITULO...

** E genial compositor y arreglista Martin Quandus “Marqua”, e aña a dicidi di manda su dos Soldatnan di mayor rango pa conquista e titulo di Rey di Tumba.

For di Martin Quandus, DEN AMBIENTE por a compronde cu e aña aki si no tin awa pa laba. Si Mario Stenen no logra di conquista e titulo, anto Guy Raven si lo bay cu ne.

Mario Stenen “El Pegueño Soldat Gigante”, lo subi riba escenario cu su Tumba “Nos Ta bay”, compone y arregla pa Martin Quandus. Guy

Raven lo presenta su Tumba “Ban Cende e Mecha di Carnaval”, compone y arregla pa e maestro Martin Quandus.

Algo cu Martin Quandus kier remarca, ta cu e aña aki pa prome bez den historia, e ta manda su soldatnan tumbero participa hunto cu Robert y su Solo banda show, ya cu den pasado semper Robert Jeand’or como cantante y su persona tabata fuerte rivalnan. Pues ta algo di aplaudi cu nan lo ta hunto riba escenario pa prome biaha...



** “El General Marqua” den kazerne cu su dos soldatnan di rango mayor, “El Pegueño Gigante Martintjie Stentjie” y “El Gran Korporal Guytjie Raventjie”...